

儀
禮
節
解

儀禮節解卷八

郝敬習

聘禮第八

聘禮諸侯相聘問之禮。古帝王盛時貢球歸一。諸侯比肩事天子。如詩書所稱巡守述職。共惟帝臣。未聞列國無故歲相問。殷相聘。世相朝也。周衰五霸強僭。要脅同盟。責以朝貢。於是有一小國事大國之禮。君朝卿聘。卑辭重幣。名雖脩好。其實臣之。仲尼所以慨然而作春秋也。去聖既遠。後人捃拾遺事。爲聘禮。其文彌盛。其道彌衰。據記。久無事則相聘。夫無事而聘。若

此其盛也。有事而聘，又何加焉？諸侯相聘，若此其侈也。聘于天子，又何加焉？儒者謂周初千八百國也，而皆如斯禮。晏嬰所謂師行糧食，飢弗食，勞弗息，方命虐民，爲諸侯憂，焉得有無事之日？昔齊宣王問交鄰，孟子規以仁義，滕文公問事齊楚，孟子諷以爲善，豈古有聘禮若斯者，而不少稱述乎？是書所言諸侯禮，多衰世意，非盡先王舊典禮也。

聘禮，君與卿圖事，遂命使者，使者再拜稽首辭，君不許，乃退。旣圖事，戒上介，亦如之。宰命司馬戒衆介，衆介皆逆命，不辭。宰書幣，命宰夫官具。

此命使臣也。大國三卿，五太夫，聘以卿，而大夫爲上介，士爲衆介。卿執政，國有大事，講于諸侯，君與執政大臣圖之，謀定遂遣之。使者卽卿，旣圖事，乃戒上介，則上戒不與圖事也。戒，預告也。介，副使也。亦如之。如使者禮辭也。宰，卽執政上卿。司馬主四方，故命司馬告衆介。逆命，猶受命。衆介不辭，輕也。幣，所齎玉帛皮馬之類，書記數也。宰，夫宰之屬，官具有司，備行齎也。

及期，夕幣。使者朝服，帥衆介夕。管人布幕于寢門外，官陳幣。皮北首，西上加其奉於左皮上。句馬則北面。句，奠。

幣于其前。使者北面。衆介立于其左。東上。卿大夫在幕
東西面。北上。宰入告具于君。君朝服出門。左南鄉。史讀
書。展幣。宰執書告備具于君。授使者。使者受書授上介。
公揖入。官載其幣舍于朝。上介視載者。句所受書以行。
此授使者幣及啓行之期。前一夕展幣授使者。使者
帥衆介夕造朝。管人司門館之人幕帷屬以布。地藉
幣也。寢門外路寢門外正朝也。官卽官具之官。幣如
周禮小行人所合六幣。玉帛皮馬皆幣也。皮虎豹熊
麋等皮。北首。皮首向北。執皮左首。陳皮北首也。西上。
乘皮自西陳而東也。所奉束帛玄纁加左皮上。北向。

西爲左也。凡享禮，皮馬陳庭下。使者親捧玉帛，升堂將命。故玉帛曰奉。時圭玉未授，束帛玄纁與皮馬先夕陳設。馬各一人右牽，北首。幣帛奠于幕上，當左馬之前。聘主君束帛加璧居先，聘夫人玄纁加琮次之。使者北面答君命也。衆介立于使者左，西爲左也。東上，使者立于東，介以次西也。卿大夫在幕東，避使者也。北上，上君也。君出門，出路寢門左。君出入由臬左。史掌策命，書所齎幣，讀其數，校之也。展省視也。使者受書授上介，按書視載也。公揖還內，從行官屬以車載幣。是夕舍于朝，待旦出也。上介旣視載所受書。

齋以行也

按庭實無常數言皮馬舉重耳夕既授幣不授玉王比忠信君之命也不宿于家明日使臣受玉遂行

厥明賓朝服釋幣于禰有司筵几于室中祝先入主人從入主人在右再拜祝告又再拜釋幣制句玄纁束食于几下出主人立于戶東祝立牖西又入取幣降卷幣實于筭卡埋于西階東又釋幣于行遂受命上介釋幣亦如之

此使臣將行告其家廟厥明夕幣之明日賓即使者自他國稱賓禰父廟禮出必告天子諸侯將出告羣

廟載其遷主行。大夫告禰，亦奉其主行。釋猶奠也。奠帛于禰，告爲君使也。告廟用朝服。古禮服皆稱朝服。筵几以安神室中。奧也。筵東向，几居右。主人卽使者，在右。在祝之右。幣以丈八尺爲制。黑曰玄，赤曰纁。十端曰束。每匹捲兩端束五匹也。又入祝，又入也。降降堂下，筭竹器以盛幣。行謂道路之神。有事道路，釋幣告之。旣釋幣，卽帥介受命于朝，遂行矣。

上介及衆介俟于使者之門外。使者載旌，帥以受命于朝。君朝服南鄉，卿大夫西面北上。君使卿進使者，使者入。及衆介隨入，北面東上。君揖使者進之，上介立于其

左接聞命賈人西面坐啓櫝取圭垂纁不起而授宰宰
執圭屈纁自公左授使者使者受圭同面垂纁以受命
旣述命同面授上介上介受圭屈纁出授賈人衆介不
從句受享句束帛加璧受夫人之聘璋句享玄纁束帛
加琮皆如初遂行舍于郊

此使臣行受命于朝也旣釋幣于家乃入執受君命
遂行周禮司常職通帛曰旌孤卿建旌帥使者帥介
也君使卿進使者重其禮將面命之也君揖使者進
上介同立于使者西接聞君命衆介與聞也賈價通
賈人識物價使典玉啓藏皆賈人櫝藏圭器圭瑒圭

也。周禮春官典瑞云：「璪圭建璧琮以類聘。」王比忠信。聘義云：「瑕瑜不掩，忠也。」孚尹旁達，信也。記三傳信必面命使者，然後授之。楨設于西，以其出聘，故賓之也。賈人西向跪取敬也。纁藻通畫，繪以藉王也。纁有組垂解組以呈圭也。不起跪授也。屈纁斂纁不使垂也。自公左重玉也。曲禮：「贊幣自左。」宰授使者北面授也。使者受圭與宰並立同北面也。君有命辭執玉以受也。述命循述君命存記也。同面授上介上介並立使者西也。上介受書視載故圭亦上介受出以授賈人藏之行也。衆介不從不從上介出也。獨上介出授賈

人畢仍入受享享猶獻也卽璧璋之類聘問以圭璋
通信享獻以璧琮達幣圭以問君享用束帛加璧于
帛上璋以問夫人享用玄纁加琮于玄纁上半圭曰
璋琮如璧八棱璧琮象天地璧祀天琮祀地加于帛
上帛借玉達也先言束帛後言玄纁玄纁卽束帛也
皆如初受璋璧琮如受圭也束帛玄纁先夕已受此
獨受王旣受遂行不復反于家也舍于郊受命之日
卽出宿郊外■斂旌將就道也

若過邦至于竟使次介假道束帛將命于朝曰請帥奠
幣下大夫取以入告出許遂受幣餼之以其禮上賓大

牢積唯芻禾介皆有餼士帥沒其竟誓于其竟賓南面上介西面衆介北面東上史讀書司馬執策立于其後此使臣行過他國假道之禮至竟抵他國界上借路以通也將命奉主君命以請也朝卽所過國君之朝請帥請人引導也奠幣奠其束帛不敢授而奠于地自卑也下大夫謂彼國下大夫使者非爲彼來故輕其禮餼生牲也牢禮尊卑各有常數上賓卽使者餼以大牢則上介少牢衆介特牲可知米禾薪芻皆謂之積積唯芻禾無米薪可知士帥遣士引導沒其竟盡彼國界也誓于其竟誓而後入也卿行旅從戒誓

從行之衆所過勿侵犯司馬主軍法執策示罰也

未入竟壹肆爲墼

倅

壇畫階惟其北無宮朝服無主無

執也介皆與

去聲

北面西上習享士執庭實習夫人之聘

享亦如之習公事不習私事

此將至所聘國使臣習儀也壹逐一也肆習也習其

行禮之節

累土

爲園曰墼壇壇塲墼土以象壇塲畫

地以象東西階惟其北以象房室爲堂深之節依以

行禮也無宮不爲外垣也朝服見君之服無主不立

主人不敢攝尊也無執不執王不陳重器也介皆與

北面西上習享習聘享之儀卽後聘享于廟賓入門

左介皆入門左北面西上之禮預習也士謂衆介執庭實謂執皮庭下禮惟王帛使者親奉升堂其他皮馬之類皆實之庭下也習夫人之聘享同于君也公事爲君聘享之事私事使臣私覲之事

及竟張旛誓乃謁關人關人問從者幾人以介對君使士請事遂以入竟

此抵聘國境上也張旛揭旗表其至也誓將入境申禁行旅也境上有關關人守之入必先謁之從者介也問幾人將供委積之具以介對以介人數對也禮上公使七介侯伯使五介子男使三介臣代君行與

傳名自解 卷八
之介爲輔行重事也。闕人旣受謁，奔告君。使者暫止境上，主君使士請問來事，遂導以入也。

入竟，斂旆，乃展布幕。賓朝服立于幕東西面，介皆北面。東上，賈人北面坐拭圭，遂執展之。上介北面視之，退復位。退圭，陳皮北面，西上，又拭璧展之。會諸其幣，加于左皮上。上介視之，退。馬則幕南北面，奠幣于其前。展夫人之聘享，亦如之。賈人告于上介，上介告于賓。有司展羣幣以告，及郊，又展如初。及館，展幣於賈人之館，如初。此使臣旣入境，展幣也。入境，館于境上，斂旆暫駐也。展展視玉帛皮馬之類，恐遠道齋持疎虞也。退圭，圭

既展卽藏不陳設也。合諸幣以璧琮合束帛加于左皮上。如初受幣之儀。賈人告。告展畢也。有司賓介之執事者。羣幣聘羣臣及私覲之幣。及郊至國門外及館至國中館舍展幣于賈人之館。賓館勞問不暇也。○按入境三展幣不已勞乎。雖臣子貢君父儀不及此。此春秋魯鄭事齊楚足恭之禮。苟無事而相聘何若此其極也。

賓至于近郊。張旌。君使下大夫請行。句反君使卿朝服用束帛勞。句上介出請入告。句賓禮辭迎于舍門之外再拜勞者不答拜。賓揖先入。受于舍門內。勞者奉

幣入東面致命賓北命聽命還旋少退再拜稽首受幣
勞者出句授老幣句出迎勞者勞者禮辭賓揖先入勞
者從之乘皮設賓用束錦儼勞者勞者再拜稽首受賓
再拜稽首送幣勞者揖皮出乃退賓送再拜夫人使下
大夫勞以二竹簋方句玄被纁裏有蓋其實棗燕栗擇
句兼執之以進賓受棗大夫二手授栗賓之受如初禮
句儼之如初

此主君使人勞賓于郊也使下大夫請行請使臣所
往不敢必其爲已至也下大夫反告君乃執主人之
禮使上大夫朝服束帛迎勞慰其遠來勤劬也上介

出請所事入以勞者之意告賓賓禮辭而后出迎于館舍門外再拜拜主君之命也勞者不答拜奉使不敢承其禮也賓揖先入導客也入受受其勞幣也于舍門內不登堂也勞者奉幣入入門左也致命致主君之命賓北面聽猶臣也還少退避不敢當也授老幣賓受束帛以授家臣執事之長曰老出迎賓自出迎乘皮設賓設四皮于門內親奉束錦以饋勞者束錦以先皮也禮賓曰饋勞者拜而稽首敬使者如敬聘君也勞者乃揖賓有司之執皮者出受之以退也此以上受主君勞之禮也夫人主君夫人使下大夫

降于君也。竹簋方，竹器似簋而方。簋通作筥，筥圓，筥方。簋圓，簋方。此似簋而方也。被巾也。簋有蓋，加被覆之。棗蒸則熟，栗擇則潔。擇，選擇。內則云：栗曰撰之，兼執謂二手各執一簋。賓受棗，大夫乃併二手授栗。賓受之，如始受君勞之禮。以禮，賓下大夫亦乘皮束錦如賓君使也。此以上受夫人勞之禮。

按勞禮行于門。賓未卽次也。故其致館亦然。鄭以爲侯伯使臣之禮。公使臣受勞堂上，臆說也。

下大夫勞者，遂以賓入。至于朝，主人曰：不腆先君之祧，旣拚糞以俟矣。賓曰：俟閒。大夫帥至于館。卿致館，賓迎。

再拜卿致命賓再拜稽首卿退賓送再拜

此賓入而君使人致館也下大夫既勞賓遂導賓以入至朝門外入告君主入卽主君遠祖廟曰祧掃除曰拚古者行禮必于廟賓適朝以臣禮詣君主入俟于廟以賓待使臣也賓曰俟閒請待主君閒暇行色倉卒休沐而后可進不敢自言閒而言俟君閒婉辭也大夫乃帥引賓至館君使卿致館于賓記云卿館于大夫蓋主于大夫家也卿致命致主君館賓之命也賓迎賓送卽其館迎送不言入于門外致也

按賓至不先授館者主人敏于承事卽掃宗廟以迎

賓未敢以私室褻之也。及賓俟閒而後致館。體其私也。致必以卿重其禮也。賓先至朝後適館。不敢先卽安也。

宰夫朝服設殮。句飪一牢在西鼎九羞。鼎三腥一牢在東鼎七。堂上之饌八。西夾六。門外米禾皆二十車。薪芻倍禾。上介飪一牢。在西鼎七羞。鼎三堂上之饌六。門外米禾皆十車。薪芻倍禾。衆介皆少牢。

此賓始至館。主人饋殮。宰夫主膳羞熟食曰殮。有腥言熟食。賓卽次未舉火。饋主熟也。無生牽故但謂殮。詩云有饌簋殮。春秋傳曹僖負羈饋盤殮。皆熟食也。

飪熟也。腥鮮也。牛羊豕三牲備爲一大牢。以一大牢烹熟爲飪。實鼎列于庭下。西凡九。九者正鼎。牛羊豕魚腊腸胃膚鮮魚鮮腊也。羞鼎。陪鼎也。正鼎成禮。羞鼎以食。又一大牢。割鮮爲腥。實鼎列于庭下。東凡七。無鮮魚鮮腊也。飪西腥。東東生西成也。鼎實不止牛羊豕。皆言牢者。三牲爲主。陪鼎三。亦牛羊豕。堂上之饌。豆簋之類。皆以八爲數。夾。夾室。今廂房。西夾設饌。食從者也。以六爲數。殺也。門外米與禾皆二十車。共四十車也。藁實并刈曰禾。供爨曰薪。飼馬曰芻。倍禾各八十車也。上介一牢。亦大牢也。衆介少牢。羊豕無

牛也

按上公之使其介七人則是賓與上介一殮之費米
禾薪芻車一百八十乘又衆介六人數半上介亦用
車一百八十乘通車三百六十乘也無論薪米狼戾
雖街衢充塞何地可容及饗餼之歸愈侈費矣晏嬰
所謂飲食若流者其然與

厥明訝賓于館賓皮弁聘至于朝賓入于次乃陳幣卿
爲上擯大夫爲承擯士爲紹擯擯者出請事公皮弁迎
賓于大門內大夫納賓賓入門左公再拜賓辟鞋不答
拜公揖入每門每曲揖及廟門公揖入立于中庭賓立

接西塾

此主君迎賓于廟也。厥明賓至館之明日。訝迓同皮弁。卿大夫以上朝服之冠。周禮春官司服云。視朝皮弁服。次朝門外設帷暫止也。廟在朝門內左。賓至入次。俟陳幣也。擯主君所使迎賓者。周禮大行人天子待上公。擯者五人。侯伯四人。子男三人。諸侯待鄰國賓。擯止三人。上擯近主君。承擯繼之。紹擯又繼之。擯者出請賓來事。公皮弁同賓服出迎。大門內闌東也。大夫爲上擯。延賓入大門內左。入以西爲左。公再拜。賓不答不敢承拜也。大門內曲而東爲角門。又曲而

北爲五廟大門。又入爲太祖廟中門。每門每曲主賓皆揖。及太廟門。公揖賓先入。俟賓也。立庭下。南北之中。不言面。主位東面可知也。賓立接西塾。近廟門外西堂也。門堂曰塾。

按旅賁交賁。見周禮。大行人介紹傳命。見禮記聘義。皆無明數。鄭氏以臆難演。難盡據也。賓介及境。旣遣士請事。及郊。又使大夫問行。豈尚不知其爲聘享乎。入廟陳幣。尚問來事。非彌文與。主人盛禮延賓。故陳賁。賓盛儀從。見主人。故紹介。古人交際有居間。有先容。未專爲請事耳。周禮上公賓主之間九十步。侯伯

五十步。子男三十步。謂諸侯朝位。去天子所立遠近以貴賤爲差。鄭謂爲賓主序立之位。以考工記應門二徹三個爲三丈六尺。末擯末介相去亦三丈六尺。合大門之廣。賓至末介主至末擯亦三丈六尺。穿鑿附會如此。世稱鄭精于禮。皆此類也。

几筵旣設。擯者出請命。賈人東面坐。啓牘取圭。垂纁不起而授上介。上介不襲執圭。屈纁授賓。賓襲執圭。擯者入告。出辭。玉納賓。賓入門。左介皆入門。左北面。西上。三揖。至于階。三讓。公升二等。賓升西楹。西東面。擯者退中庭。賓致命。公左還。旋北鄉。向擯者進。公當楣再拜。賓三

退負序公側襲受玉于中堂與東楹之間擯者退負東
塾而立賓降介逆出賓出公側授宰玉楊句降立擯者
出請賓楊奉束帛加璧享句擯者入告出許句庭實句
皮則攝之毛在內內攝之入設也賓入門左揖讓如初
升致命張皮公再拜受幣士受皮者自後句右客句賓
出句當之句坐攝之公側授宰幣句皮如入右首而東
聘于夫人用琯享用琮如初禮若有言則以束帛如享
禮

此使臣行聘享于廟也几筵所以安神古者大禮行
于太廟擯出請命請于賓也賈人東面啓積取圭殊

于在國西面者異邦圭爲主也取圭垂纁呈圭也不
起授上介敬也襲重包也上介不襲赤手併纁裼執
圭屈折其纁以圭授賓賓以衣重襲受圭執之示變
也將入致信于主君而擯出辭玉不敢當重器也賓
自西塾入廟門左由闈西也北面西上賓立西介以
次東也三揖三讓升堂君東賓西上介以下猶立門
左也公升先二等主君尊也賓升西楹西東面向主
君也擯者從公入至東階下公升堂擯者退立庭中
賓執圭堂上東向致聘問之命公西就楹閒受玉左
體轉向北將拜擯進近階下贊拜公拜東楹西當相

楹上橫梁曰祖賓三退避拜負序負西牆側獨也無贊曰側公親受不用贊也襲受玉謂以衣重襲手受敬也當堂南北之中兩楹間少偏近東凡堂上受授賓主敵則兩楹正中主尊則偏東賓尊則偏西東西相向也擯者乃退出廟門外負東塾立賓既授玉致命下堂介立門左北面西上近東者先出便故曰逆出賓乃出取幣更入行事也公側授玉于宰不用贊親授重也不襲曰楊玉外有纁不襲手楊執授之謹也記云裘之楊見美也詩云載衣之楊單曰楊重曰襲單纁藉玉不襲執纁猶裘見美也降立公降東階

立庭下俟賓也。此以上皆行聘之事。賓復自廟門外
奉束帛加璧。璧外有包藉。賓手裼捧亦不襲也。享獻
也。庭實皮馬之類。實于庭下。皮則使人攝攝兼執也。
左手執前兩足。右手執後兩足。毛在內防損傷也。內
攝謂反攝不見毛也。入設謂入庭致命。乃張設也。揖
讓。公與賓相揖讓。賓升堂。致其君享獻之命。庭下乃
張皮。見毛主席。君之士受皮。由執皮者後過。西客在右。
受者在左。北面西左也。賓出將致聘夫人也。士受皮
庭下者。當賓降跪攝皮不敢立。示敬也。公堂上以所
受璧帛親授宰。庭實則有司受。玉帛則君親。故圭璧

皆曰側授無擯贊也。如入謂士受皮者亦如初入內攝也。右首以首居右獻禽者左首以尊者在左也。受者右首避尊也。東歸東壁此以上皆行享之事。聘于夫人賓更入行聘也。享夫人謂聘畢更入行享也。皆主君受之。若有言謂聘君有事來告則于聘享畢以束帛加書致命如享禮也。

按記云凡執玉無藉者襲則有藉者裼也。襲裼爲玉甚明。鄭解襲裼專爲衣服升降授受須臾不下堂不入次易服何所。曲禮裘之裼也見美也。裘之襲也充美也。候裼候襲於義何取。然則執玉必冬裘而后可。

乎

擯者出請事。賓告事畢。賓奉束錦以請覲。擯者入告。出辭請禮。賓禮辭聽命。擯者入告。宰夫徹几。改筵。公出迎賓以入。揖讓如初。公升。側受几于序端。宰夫內拂几。三奉兩端以進。公東南鄉。句外拂几三。句卒。句振袂。句中攝之。句進西鄉。擯者告。賓進。訝受几于筵前。東面俟。句公壹拜送。句賓以几辟。黻北面設几。不降。句階上答。再拜稽首。宰夫實觶以醴。加柶于觶。面枋。柄公側受醴。賓不降。壹拜。進筵前受醴。復位。公拜送醴。宰夫薦籩豆脯醢。賓升筵。擯者退。負東塾。賓祭脯醢。以柶祭醴。三庭。

實設降筵北面以柶兼諸解尚撤業坐啐醴公用束帛
建柶北面奠于薦東擯者進相幣賓降辭幣公降一等
辭栗階升聽命降拜公辭升再拜稽首受幣當東楹北
面退東面俟公壹拜賓降也公再拜賓執左馬以出上
介受賓幣從者訝受馬

此聘享事畢主君禮賓也賓請覲主君辭覲欲先禮
也禮醴通賓主初接一獻曰醴徹几改筵徹神几布
賓筵也公升側受几升東階自受几于宰夫不用贊
也宰夫東壁取几筵故公受几于東序端宰內拂几
不使塵及君也奉兩端使君執几中也君執几中使

賓執兩端。猶授枳。先面葉也。宰夫授几。東序端。故君
東南向。宰夫西北向也。君三拂。致潔也。卒拂畢也。振
袂。振去袂上塵。中攝。兩手并執几中也。進西鄉。鄉賓
也。賓在西階上北面。君將進授几。擯者告賓。賓進東
行。迎受几于筵前。戶牖間。東面捧几。俟君拜。壹拜。不
再也。送送几。賓以几避君拜。北面向筵。自設几。不下
堂。西階上再拜稽首。答君也。宰夫實觶。公不親酌也。
加枳。面枋。以匙柄向前也。宰夫將代送觶。故不面葉。
禮敵則贊者面葉。授主人。主人轉授賓。柄在內。便賓
執也。主尊贊者代授。則否。詳見士冠禮。公側受醴。不

用贊自受。將以奉賓。賓不降壹拜。醴尚質也。復位。賓復西階上北面。擯者退負東塾。立于廟門外也。醴一酌一薦。無酬酢。故擯退。庭實設。主君設幣酬賓。繼薦設也。賓降筵北面。將坐啐醴也。以柶兼諸觶。弁執便啐也。尚上同。擯葉通柶端。寬薄曰葉。以葉居上。倒執亦便啐也。公用束帛親奉先馬也。賓建柶奠觶。將降辭也。擯者自東塾進贊。君授幣也。栗階猶歷階。連步一足一級升。急趨命也。降拜。拜受幣也。賓既受幣。退立西階東面。俟公拜送。公壹拜。賓不敢當。降避。公又一拜。庭實四馬。左馬爲上。庭下北面。西爲左也。賓降

西階親牽西一馬出。尊君賜也。受左馬。則乘馬并受矣。賓執馬。以幣授上介。君有司爲牽三馬出。賓從者迎受訝迎也。

賓覲奉束錦。總乘馬。二人贊入門右。北面奠幣。再拜稽首。擯者辭。賓出。擯者坐取幣出。有司二人牽馬以從。出門西面于東塾南。擯者請受。賓禮辭聽命。牽馬右之。入設。賓奉幣入門左。介皆入門左。西上。公揖讓如初。升。公北面再拜。賓三退。反還負序。振幣進授。當東楹北面。士受馬者自前還牽者後。適其右受。牽馬者自前西。乃出。賓降階東拜送。君辭拜也。君降一等辭。擯者曰。

寡君從子。雖將拜起也。栗階升。公西鄉。句賓階上再拜稽首。公少退。賓降出。公側授宰幣。馬出。公降立。

此賓私覲主君也。束錦。錦十端。賓親奉乘馬。四馬總聯八轡。賓親牽。二人贊。居左右兩馬間助牽也。禮賓陳馬。每馬一人。臣不敢爲賓入門右。臣禮也。王藻曰。公事自闌西。私事自闌東。奠幣。不敢以授也。再拜稽首。皆臣禮。賓者辭。辭臣禮也。賓旣成禮出廟門外。接西塾立。擯者取幣。有司牽馬出廟門東塾南。西面還幣馬。請賓受。不敢當臣禮也。賓一辭聽命。改禮入。使人牽乘馬。各居馬西。以右手控制便也。曲禮曰。效馬。

者右牽之先入設于庭賓奉幣入門左介皆入公與
賓揖讓升如初之客禮公北面再拜答其始入隆禮
也賓進東楹授幣君拜賓退反西負牆避拜振幣致
潔進東楹北面就君不敢全賓禮也乘馬在庭下北
向牽者四人立馬西士受者亦四人從東來自馬前
適西轉牽馬者後各以右手受轡最西牽者一人卽
由受者前西出次東三人皆自前西乃出也賓降西
階往東階下拜送幣馬私物以臣禮獻也君辭辭臣
禮而賓已下拜君降一等再辭擯致君意止之云寡
君從子言從賓降也禮爲臣降一等從賓降則與敵

者沒階同言此勸賓升也。公少退爲恭也。公自以所受束錦側授大宰不用贊其乘馬有司牽出亦受也。公降立俟介覲也。

擯者出請上介奉束錦士介四人皆奉王錦束請覲擯者入告出許上介奉幣僎皮二人贊皆入門右東上奠幣皆再拜稽首擯者辭介逆出擯者執上幣士執衆幣有司二人舉皮從其幣出請受委皮南面執幣者西面北上擯者請受介禮辭聽命皆進訝受其幣上介奉幣句皮先句入門左奠皮公再拜介振幣自皮西進北面授幣退復位再拜稽首送幣介出宰自公左受幣有司

二人坐舉皮以東擯者又納士介士介入門右奠幣再拜稽首擯者辭介逆出擯者執上幣以出禮請受賓固辭公答再拜擯者出立于門中以相拜士介皆辟去聲士三人東上坐取幣立擯者進宰夫受幣于中庭以東執幣者序從之

此介私覲主君也擯者出請公立俟也織影曰錦王錦素光如玉也束十端奉親奉儷皮兩皮使二人助攝衆介皆奉幣從入門右奠幣稽首用臣禮也擯者辭介逆出禮畢也君使擯執上介束錦使士執衆介王錦使有司二人舉上介儷皮隨幣出還之不敢受

臣禮也有司出後委其皮門外南面擯者與士執幣
前西面請受介皆進訝受幣上介奉幣更入贊者二
人前就門北面舉皮先上介執幣從入門左由客位
奠皮庭下公卽庭中再拜上介卽庭中授幣退復位
門左宰自公左贊公受幣殊于賓幣公側授宰也有
司二人坐舉皮受以東此上介私覲之儀亦先臣後
賓也擯者又延衆介入衆介皆士故曰士介入門右
奠幣稽首而出用臣禮君亦使擯還幣介固辭公遂
受士賤也公答再拜答于庭也衆介在外公拜內擯
者出立門中贊拜達其禮于衆介也衆介避不敢當

也主君之士三人坐取三介所奠幣于庭受之少一人者擯執上幣出也擯進執上幣入宰夫中庭受擯者幣士三人執幣以次從宰夫歸于東壁此衆介私覲亦始辭臣而終遂受之也

擯者出請賓告事畢擯者入告公出送賓及大門內公問君賓對公再拜公問大夫賓對公勞賓賓再拜稽首公答拜公勞介介皆再拜稽首公答拜賓出公再拜送賓不顧

此聘享私覲畢賓退也大門內廟門外也公問聘君起居及在國公卿大夫慰賓以遠來勤勞也公再拜

送于賓去後賓不顧去無答也凡主人拜送賓賓皆
不顧賓道難進易退也

按行禮無言以默爲恭故古者於旅也語然事畢出
門始問主君不已後乎鄭註及大門內爲賓至始入
門之位旅擯紹介傳辭問則又迂矣君拜不答故特
言不顧以明送賓退之禮因論語賓不顧之文鄭遂
据孔子事謂公拜客趨避公命上擯送反告賓不顧
公乃還路寢本文絕無此意強附之

賓請有事於大夫公禮辭許賓卽館卿大夫勞賓賓不
見大夫奠鴈再拜上介受勞上介亦如之

此主國卿大夫勞賓介也。賓請請于在廟禮畢，君送之時，有事于大夫，亦欲通聘問也。必請于主君，臣無私交也。及賓就館，卿大夫先至，賓不見，不承先施也。奠鴈謂下大夫繼卿至者，賓不見，不得親授，贊以其鴈奠于館舍。上介代受，士相見禮云：「上大夫贊以羔。」下大夫以鴈。上介與下大夫分敵，遂代受。卿尊主人，不見客，不奠。上介亦不敢受也。勞上介亦如之。上介異館，卿至亦不見。大夫至亦奠鴈受也。

按鄭謂卿與大夫同奠鴈，非也。卿與大夫必無同至并勞之事。

君使卿韋弁歸饗餼五牢。上介請事。賓朝服禮辭。有司
入陳。句饗。句饗一牢。句鼎九。句設于西階前。陪鼎當內
廉。東面北上。句上當碑。句南陳。句牛羊豕魚腊腸胃同
鼎。膚鮮魚鮮腊。設局鼎。句腳臠臠。句蓋陪牛羊豕。句腥
二牢。句鼎二七。句無鮮魚鮮腊。設于阼階前。西面南
陳。如飪鼎二列。句堂上。句八豆。句設于戶西。西陳皆二
以並。句東上。句韭菹。句其南醯醢。句屈。句八簋繼之。黍
其南稷。句錯。句六鉶繼之。牛以西。羊豕。句豕南牛。句
以東。羊豕。句兩簋繼之。梁在北。八壺設于西序北上。二
以並南陳。句西夾。句六豆設于西墉下北上。韭菹其東。

醢醢屈句六簋繼之句黍句其東稷句錯句四鉶繼之
牛以南羊句羊東豕句豕以北牛句兩簋繼之梁在西
皆二以並南陳六盂西上二以並東陳饌于東方亦如
之西北上壺東上西陳醢醢百饗夾碑十以爲列醢在
東句餼句二牢陳于門西北面東上牛以西羊豕豕西
牛羊豕米百筥筥半斛設于中庭十以爲列北上黍梁
稻皆二行稷四行門外米三十車車秉有五簋設于門
東爲三列東陳禾三十車車三秬杜設于門西西陳薪
芻倍禾賓皮弁迎大夫于外門外句再拜大夫不答拜
揖入及廟門賓揖入大夫奉束帛入三揖皆行至階

句讓大夫先升一等。句賓從升堂。北面聽命。大夫東面致命。賓降階西。再拜稽首。拜餼亦如之。大夫辭升成拜。受幣堂中西。句北面。大夫降出。賓降授老幣。出迎大夫。大夫禮辭許入。揖讓如初。賓升一等。大夫從升堂。庭實設。馬乘。賓降堂受老束錦。大夫止。賓奉幣西面。大夫東面。賓致幣。大夫對北面。當楣再拜稽首。受幣于楹間。南面退。東面俟。賓再拜稽首送幣。大夫降執左馬以出。賓送于外門外再拜。明日賓拜于朝。拜餼與餼皆再拜稽首。

此主君歸賓餼餼使卿使上大夫重其禮也。韋弁然

皮爲弁。兕觥之屬。戎服之冠。犒大衆戎服敬其事也。歸送也。饗熟食。餼生牲。朝曰饗。夕曰飧。始至設飧。既館歸饗。五牢。飪一脰二皆饗也。生二皆餼也。上介請事請卿事于門外也。朝服皮弁服。有司入陳就所館。大夫家廟陳設也。饗亦有飪。有脰烹熟曰飪。一牢殺牛羊豕各一烹之。實鼎九。先設賓階下。禮主饗也。陪鼎副鼎。鼎主牛羊豕。故以鼎副之。卽下文腳臙臙也。階邊曰廉。內廉西階級升堂。東折角處當對也。鼎在階下北當內廉。避堂途也。東面鼎皆東向也。北上鼎居北者爲首。以次而南也。上當碑。碑在廟庭中。鼎北

與碑齊並西直陳而南也。九鼎：牛一、羊二、豕三、乾魚四、腊乾禽五、牛羊腸胃同鼎六、膚純肉七、鮮魚八、鮮腊九也。肩鼎鉉詳士冠禮。及考工記匠人職：鑄鼎蓋，躡牛臠臠，羊臠臠，豕臠有菜曰羹，無菜曰臠，卽陪鼎之實也。蓋語辭，釋所謂陪鼎者。陪三牲爲副鼎。以上皆飪鼎也。生肉曰腥。二牢殺牛羊豕各二，并魚腊腸胃膚皆以生肉爲鼎各二，共十四，無鮮魚鮮腊少飪鼎之二也。腥設于東，從生氣也。北當碑東，直陳而南，與西飪鼎東西各爲二列。以上皆腥鼎也。堂上之饌八豆，周禮醢人掌四豆之實，菹醢相閒，朝事之豆。其

實韭菹醯醢昌本麋藟菁菹鹿藟茆菹麋藟凡八也
戶西室戶西堂牖東卽客位也西陳自東設至西皆
二以並菹醢相對兩行橫列也向西陳以東爲上也
韭菹居東北其南爲醯醢醢醢之西昌本昌本之西
麋藟麋藟之西菁菹菁菹之北鹿藟鹿藟之東茆菹
茆菹之東麋藟麋藟之東卽接韭菹也自醢醢曲轉
而西而北故曰屈外園內方曰簋以盛黍稷八簋黍
稷各四繼豆而西一黍居北其南爲稷二稷居北其
南爲黍三黍居北其南爲稷四稷居北其南爲黍故
謂錯也釧羹器六釧牛羊豕羹各二繼簋而西牛居

東西爲羊。又西爲豕。北一列也。豕南爲牛。牛東爲羊。又東爲豕。南一列也。豕牛二鉶。南北相錯。羊二鉶居中相當也。外方內圓曰簠。以盛稻粱。兩簠稻粱各一。繼鉶而西。梁居北。稻居南。壺酒器。酒八壺。順堂西牆。自北而南。兩兩相對。向南陳也。終酒稻粱。禮主食成。于酒也。此以上皆堂上之饌。堂兩廂曰夾。西夾西側。室東向也。西墉夾室西牆也。北上堂在北。陳饌自北始。韭菹在西北。其東爲醯醢。醯醢之南昌本。昌本之南麋藟。麋藟之西菁菹。菁菹之北鹿藟。鹿藟之北卽韭菹。故曰屈。六簋黍稷各三。繼豆而南。黍在西北。東

爲稷。稷南爲黍，黍西爲稷，稷南又爲黍，黍東又爲稷。
故曰錯。四釧，牛二，羊豕各一，繼簋而南。牛居西北，牛
南爲羊，羊東爲豕，豕北爲牛，二牛相當，羊豕并列也。
兩簋稻粱各一，繼釧而南。粱西稻東，豆簋釧簋皆兩
兩相並而南。惟壺近簋，在南墉下，自西陳而東，亦以
兩爲列。六壺並爲三列，以上皆西夾之饌也。東方東
夾室西向，室雖東而饌亦如西夾，以西北爲上，從堂
上與西階也。韭菹在西北，醯醢在東，以下皆與西夾
同。惟六壺在南墉下，自東而西，以順室之西向，成主
人東面之義。因饌牢在門，亦東爲上也。此以上東夾

之饌也。醯醢也。醢肉醬也。夾陳于庭中。碑左右衆鼎之間。二物兼爲腥飪設也。十以爲列。謂左右直列。醯五行在碑東。穀味居左也。醢五行在碑西。肉味居右也。自飪一牢以下至此。皆所謂饗也。自醢二牢以下。皆所謂饌也。二牢。謂生牛羊豕各二。陳于廟門內西。北面向堂。自東而西。牛羊豕。牛羊豕六牲相間。共爲一行。筥。竹器。半斛。五斗也。中庭。庭下中。醯醢之南。十以爲列。橫設也。四米爲十行。自北而南。稷獨四行。稷百穀長。用廣也。此以上皆陳于廟門內者。十六石曰秉。十六斗曰筥。秉有五筥。是二十四石也。一車二十

四石三十車共米七百二十石設于門東爲三列每
列車十乘門爲上以次陳而東也禾四百把爲一秬
三秬爲一千二百把一車一千二百把三十車爲禾
三萬六千把設于門西亦門爲上陳而西也薪芻倍
禾則車各六十乘薪芻各七萬二千把也賓朝服此
云皮弁卽朝服之冠也大夫卽君所使卿韋弁者門
卽賓館大夫家之門卿次門外廟在大門內賓與大
夫揖入廟門賓揖先入導行大夫奉束帛執以將命
賓與大夫并行及西階讓大夫先升一等賓從之升
堂北面聽致主君命賓先拜饗復拜餼束帛致命同

拜則殊也。大夫辭辭賓降也。受幣堂中央。賓在大夫西北面受。尊主君也。大夫事畢降出。賓降以幣授家老。出迎大夫。將以禮償也。升階賓先。異于始入者。始致君命先大夫。今私事先賓也。庭賓設四馬。家老致束錦堂下。皆以償大夫也。賓降受束錦。大夫止不降。贈已嫌訝受也。賓奉束錦升。與大夫東西授受。禮敵也。賓致幣有辭。大夫亦以辭對。拜于當楣。受于楹閒。皆敵禮。稽首尊君使也。東面俟賓拜。亦敵禮也。執左馬出。解見禮賓。

按周禮兵事韋弁服。視朝皮弁服。皮弁飾以采璽。韋

弁無飾非美于皮弁而戎事重于朝事故韋弁服尚
赤皮弁服尚黑皮弁服卽朝服鄭謂朝服與皮弁服
異非也兩夾室在堂東西相向故其陳設皆自北而
南酒近簠以終饌而縮陳于夾室南墉下鄭謂壺在
北墉下近豆夫堂上之壺旣不近豆而夾室獨否乎
上介饗餼三牢任一牢在西鼎七羞鼎三腥一牢在東
鼎七堂上之饌六西夾亦如之筯及饗如上賓餼一牢
門外米禾視死牢牢十車薪芻倍禾凡其實與陳如上
賓下大夫韋弁用束帛致之上介韋弁以受如賓禮
句
賓之兩馬束錦句士介四人皆餼大牢米百筯設于門

外宰夫朝服牽牛以致之士介朝服北面再拜稽首受
無賓

此歸介饗餼禮降于賓二等三牢饗二餼一也鼎七
無鮮魚魚腊也羞鼎卽倍鼎堂上之饌六用賓西夾
之數此西夾不殺以東夾全損也米醯醬不殺常用
等也以上皆饗也死牢卽飪腥上介飪腥共二牢米
禾視死牢之數每死牢一從以米禾各十車則米禾
各二十車米四百八十石禾二萬四千把薪芻倍禾
則薪四萬八千把芻亦四萬八千把使下大夫致之
介與賓異館上介亦韋弁受之禮敵也亦以禮饋使

者兩馬束錦也。士介四人無饗各餽以大牢。用牛羊豕共十二米。各百筭。人五十石。共米二百石也。宰夫致之士。介與上介異館。使宰夫使士歸士也。宰夫不言皮弁士以下朝服玄冠也。宰夫牽牛則有司牽羊豕可知。無償士介無幣償宰夫也。

按介與賓饗餼之費用米共一千四百石。禾六萬把。薪十二萬把。芻亦十二萬把。牛羊豕共三十六頭。費亦夥矣。周禮掌客職云。天子待侯伯之禮醯醢百。鬯米百筭。今諸侯使臣諸侯禮之與侯伯同。是季世之奢也。孔子曰。奢則不遜。儉則固。與其不遜也。寧固。故

聘禮非先王之舊也

賓朝服問卿卿受于祖廟下大夫擯擯者出請事大夫朝服迎于外門外句再拜賓不答拜揖大夫先入每門每曲揖及廟門大夫揖入擯者請命庭實設四皮賓奉束帛入三揖皆行至于階讓賓升一等大夫從升堂北面聽命賓東面致命大夫降階西再拜稽首賓辭升成拜受幣堂中西句北面賓降出大夫降授老幣無僨擯者出請事賓面如覲幣賓奉幣庭實從入門右大夫辭賓遂左庭實設揖讓如初大夫升一等賓從之大夫西面賓稱面大夫對北面當楣再拜受幣于楹間南面退

西面立賓當楣再拜送幣降出大夫降授老幣

此使臣問卿因私面也使臣初覲主君卽請有事于大夫旣聘其君卽問其大臣皆聘君之命也至是始問者記謂致饗之明日問大夫是也下大夫擯卿使下大夫相禮也擯者卽下大夫大夫卽卿賓不答拜不敢承拜也大夫先入廟門省內事也賓俟于門外擯者請命大夫乃出迎庭實聘君所以享卿者束帛賓親奉以將命也賓與大夫并行及階讓賓先升尊君使也大夫北面聽命降階稽首升成拜皆臣禮與賓受饗餼禮同無擯謂卿無幣擯賓也擯者出請事

賓將復入私面。擯入告卿出迎也。賓面卿之幣如覲。君亦束錦四馬也。賓親奉束錦庭實四馬從之。賓入門右。謙不敢就客階也。賓稱面致面見之辭。大夫以辭對。北面當楣再拜以下。與卿致饗餼受饋禮同。皆北面稽首者。幣交皆君事也。

按春秋世五霸主盟其執政大臣權與君侔。當世謂媚奧寧媚竈。若齊高鮑晉范趙諸侯事之如事君。斯禮寔監觴矣。以大夫家用公朝大夫爲擯。非威權震主而若是乎。好信者盡執爲先王之禮誤矣。

擯者出請事。上介特面幣如覲。介奉幣。句皮二人贊入。

門右奠幣再拜。大夫辭。擯者反幣。庭實設。介奉幣入。大夫揖讓如初。介升。大夫再拜受。介降拜。大夫降辭。介升。再拜送幣。擯者出請衆介。固如覲幣。入門右奠幣。皆再拜。大夫辭。介逆出。擯者執上幣出。禮請受。賓辭。大夫答再拜。擯者執上幣立于門中。以相拜。士介皆辟。去。老受擯者幣于中庭。士三人坐取羣幣以從之。擯者出請事。賓出。大夫送于門外。再拜。賓不顧。擯者退。大夫拜辱。

此介私面。卿擯者出請事。蓋賓出而介俟于門外也。上介特面。不與士介俱也。幣如覲。君亦束錦儷皮也。上介親奉束錦。贊者二人執皮從。入門右降等也。曲。

禮曰客若降等則就主人之階主人辭然後客復就西階是也奠幣再拜不敢親授奠之而拜于堂下大夫辭反幣然後從客禮亦如覲公此上介私面之禮也擯者又出請士介入也衆介卽士介如覲幣各王錦束也入門右奠幣出與上介同卿始辭終受異也下大夫相禮受幣與相君私覲同解見前擯者又出請事蓋禮畢而賓尚在廟門外故復請終事也擯者卽下大夫也相禮畢去卿拜辱謝也

按上介亦大夫面其主國卿至入門不敢左與士介皆奠幣堂下再拜比于爲臣而主卿所以待者無以

異于主君抑何貴倨甚與殆于魏冉范雎之爲卿者
子云天下有道政不在大夫是書于大夫禮加詳故
知非先王之舊也

下大夫嘗使至者句幣及之句上介朝服句三介問下
大夫句下大夫如卿受幣之禮句其面句如賓面于卿
之禮句大夫若不見句君使大夫各以其爵爲之受如
主人受幣禮不拜

此申言賓介問面卿大夫之禮大國三卿五大夫卿
皆上大夫皆賓親致命如前禮下大夫皆有幣及若
嘗出使至于其國者有故舊之誼則使上介奉幣致

命上介朝服而往其餘下大夫則使士介奉幣不言朝服可知也下大夫受幣如卿受賓幣之禮上介與三介面下大夫如賓面上大夫之禮大夫若不見謂自卿至下大夫或有故不得見賓介者主君各以其爵使人代受幣卿使卿受大夫使大夫受但代受幣不代答拜代者不敢實承其禮也

夕夫人使下大夫韋弁歸禮堂上籩豆六設于戶東西上二以並東陳壺設于東序北上二以並南陳醢黍清皆兩壺大夫以束帛致之賓如受饗之禮償之乘馬束錦上介四豆四籩四壺受之如賓禮償之兩馬束錦明

日賓拜禮於朝

此主君夫人致禮于使臣也。夕，卽賓問卿之夕。夫人禮從陰也。籩豆用六，周禮籩豆之實八，此殺其二。戶東室戶東，設于東房前。夫人爲房中之主，陳設不中堂，避君也。西上，以西爲首。豆在西，籩繼之而東。變于君饌，東上也。二以並同，東陳則異。君歸饗重食，故有黍稷稻粱。夫人歸禮重飲，故但酒六壺，設于東序。與君西序異。二以並，南陳則同。醖酒未沛而濁，卽糟也。清酒之陳久者，黍、黍酒、酒、惟稻、黍、粱三品，內則云飲重醴、稻醴、清糟、黍醴、清糟、粱醴、清糟、稻黍粱皆清糟。

二壺文義錯見。大夫卽下大夫束幣。所以酬酒也。乘馬束錦。賓介所以饋下大夫也。禮上介殺賓二等。不言士介。禮不及也。賓拜禮于朝。則上介可知。

大夫餼賓。大牢。米八筐。賓迎再拜。老牽牛以致之。賓再拜稽首受。老退。賓再拜送。上介亦如之。衆介皆少牢。米六筐。皆士牽羊以致之。

此卿餼賓介也。大夫卽卿。米謂黍梁稷。記云。凡餼大夫黍梁稷。無稻。方曰。筐其實五斗。老家相士衆宰。大牢先牛。故老牽之。少牢先羊。故士牽之。

公於賓。壹食再饗。燕與羞。俶獻無常數。賓介皆明日拜。

于朝上介壹食壹饗。若不親食，使大夫各以其爵朝服致之以侑幣。如致饗，句無償，句致饗以酬幣，亦如之。此君燕饗，餽獻使臣之數。食設飯以食之，饗設酒以饗之。食饗于廟，燕于寢。熟味曰羞，新物曰俶。俶始也。明日，食饗燕獻之次日，不親食，謂主君有他故，不得親食，使大夫與賓上介爵等者代致勸食曰侑。送酒曰酬，皆以幣。

大夫於賓壹饗壹食。上介若食若饗，若不親饗，則公作大夫致之以酬幣。致食以侑幣。

此大夫享食賓介之數。大夫謂主國卿饗食于賓各

一舉于上介。或饗或食，不兼舉也。不親饗，謂大夫有故，則公使大夫爲代致之。

君使卿皮弁還玉于館。賓皮弁，句襲迎于外門外，不拜。帥大夫以入。大夫升自西階，鉤楹，賓自碑內聽命，升自西階，自左南面受圭，退負右房而立。大夫降中庭，賓降，句自碑內東面授上介于阼階東，句上介出請，句賓迎大夫還璋，句如初入。賓謁迎，大夫賄用束紬，句禮。玉束帛，乘皮，句皆如還玉禮，句大夫出，賓送，不拜。

此主君使卿還玉報贈也。玉以表信，信達而禮行，還以其信歸之，所以受幣還玉。玉卽圭璋也。掩手曰襲。

袒手曰裼。執玉之禮。襲重裼輕。記曰。凡執玉無藉者。襲還圭。必呈現。賓以朝服掩手承之。慎重之至也。大夫卽卿。大夫奉玉。賓先帥入。大夫升堂。由楹間南面。賓立庭中。碑內聽命。後由西階升。不敢由阼。圭在如君也。升堂西爲左。賓由大夫左。大夫北面授賓。南面受襲。受也。自左尊主器也。右房卽東房。升堂東爲右。賓自大夫左南面受玉。卽退東北負房而立。俟大夫先降至中庭。賓乃降西階東行。由碑內過阼階下東面授圭于上介。此還圭之禮也。上介出請。大夫奉璋入璋。君夫人所以聘也。如初入。與還圭同。賓裼迎與。

受圭異徒手併纁受之曰楊璋不呈故不襲禮殺于圭此還璋之禮也還玉有幣資送曰賄紡紡絲爲帛也紡之言防重玉致防護也禮主君報聘君之禮亦以璧加于束帛乘皮四皮也還玉則併致之授受之禮與還玉同

按古廟制房與室皆在堂北南向而房在室東故謂東房無西房也此言右房者升堂以東爲右註疏謂爲西房誤也玉比德古人以爲信朝覲聘享用之聘義曰孚尹旁達尹割也玉難割割則孚瑕瑜不相掩離以爲圭璋旁達而不失其孚故比忠信君子不竭

人之忠以全交也。聘享還玉禮之善物。非聖人不能作。

公館賓。賓辟。去聲。上介聽命。聘享。句。夫人之聘享。問大夫。句。送賓。公皆再拜。公退。賓從。句。請命于朝。公辭。賓退。賓三拜。乘禽於朝。訝聽之。遂行。舍于郊。公使卿贈如覲幣。受于舍門外。如受勞禮。無僨。使下大夫贈上介。亦如之。使士贈衆介。如其覲幣。大夫親贈。如其面幣。無僨。贈上介。亦如之。使人贈衆介。如其面幣。士送至于竟。此使臣將反。主國君臣贈送之禮。公館賓。公就賓于館。將行親送。且謝之。卽還玉之明日也。賓避不敢受。

上介聽君命于館門外。聘享以下凡四事皆公所爲拜者。送賓送賓行也。皆再拜。是八拜也。賓從請命于朝。以主君有拜四事之命。不敢受于其館。而更請受命于朝。人臣之禮也。公辭辭其請也。乘禽鵷鴨之屬。可羣畜者曰乘。聘義云。乘禽日五雙。至是乃拜者。物小賜頻。故于臨行併拜三拜。報其頻也。訝主君所使迎賓客者。周禮秋官有訝士。記云。卿大夫訝此。蓋大夫也。凡拜賜不親見。入告出報。皆訝聽之。聽待也。遂行。賓啓行歸也。舍于郊。如始出也。古者遠行。初出祖祭。宿近郊。公使卿贈使臣行。亦如賓私覲之幣。所以

報也。無償謂使臣不復以禮物償卿。使下大夫使士皆君使也。大夫親贈以下卿私贈也。

使者歸及郊請反命。朝服載旌襍乃入。陳幣于朝。西上。上賓之。公幣私幣皆陳。上介公幣陳。他介皆否。束帛各加其庭。實皮左。公南鄉。卿進使者。使者執圭垂纁北面。上介執璋屈纁立于其左。反命曰。以君命聘于某君。某君受幣于某宮。某君再拜。句以享某君。句某君再拜。宰自公左受玉。受上介璋致命亦如之。執賄幣以告曰。某君使某子賄授宰。句禮玉。句亦如之。執禮幣以盡言。賜禮。句公曰。然而不善乎。授上介幣再拜稽首。公答再拜。

私幣不告君勞之再拜稽首君答再拜若有獻則曰某君之賜也君其以賜乎上介徒以公賜告如上賓之禮君勞之再拜稽首君答拜勞士介亦如之君使宰賜使者幣使者再拜稽首賜介介皆再拜稽首乃退介皆送至於使者之門乃退句揖使者拜其辱釋幣于門乃至于禴筵几于室薦脯醢觴酒陳句席于阼薦脯醢三獻一人舉爵句獻從者句行酬句乃出上介至亦如之此使臣反命及還家之禮請反命待君命後入也載旌張旌表其還也禴禴祭祓除不祥致潔敬也公幣他國君所賜使臣之幣私幣他國卿大夫以下之贈

幣西上陳幣先西先公後私先賓後介以次而東也束帛各加于庭實皮左非致命不親執也執圭垂纁呈圭見君脫其纁垂也執璋屈纁璋不呈也上介立于左立賓西也北面西爲左受幣于某宮謂受于其國祖廟如桓宮僖宮之類宰自公左受玉南面東爲左贊幣自左也上介致命亦如之如使者反命之辭致于君也賄幣還王之幣某子指還玉大夫授宰授于受玉之宰禮玉卽報禮之玉與束帛乘皮亦如執賄幣告以授宰也禮幣謂其君初僨禮使臣之幣獨執此言禮者此主君在廟所親授也自郊勞至賄贈

受賜之禮一一盡言于君而猶汝也善嘉歎辭授上介幣使者將拜故以所執幣授之上介受以反于庭實皮左也私幣不告輕也若使臣私有物獻于君則曰君其受以賜予乎不敢當君自用也上介徒以公賜告不執幣告也上賓即使者君答上介拜不言再答一拜也士介亦如之亦答一拜也曲禮曰君於士不答拜此答其勤勞也君使宰賜幣即賜所陳幣臣受外賜不敢私而獻之君父君父還之則拜如更受賜也乃退使介皆退也介皆送使者至門始出俟于其門終歸亦送于其門也退揖介退揖辭使者也使

者拜其辱。謝介也。釋幣于門。使者自禮其家門也。行爲道路之始。出則禮之。門爲家庭之限。入則禮之。筵几薦獻于禰廟。告反也。門釋幣。禰釋奠。重禰也。室在廟堂之後。所謂奧也。脯醢薦神也。觴爵屬。觴酒陳。備獻也。觴陳則籩豆俱可知。席于阼。酢主人也。奠無尸而酢。旣獻。主人自酢也。不于室于阼。將與從者爲禮于堂也。薦脯醢。薦于主席也。三獻。謂初獻禰。主人自酢。再獻室老。室老酢主人。三獻士。士酢主人。三獻成。更一人舉爵酬主人。主人不飲。奠于薦左。更酌酒獻。從行家臣。獻畢。主人舉所奠一人之爵。行旅酬以徧。

所謂飲至也。上介至其家。釋幣于門。釋奠于廟。亦如之。

聘遭喪。入竟則遂也。不郊勞。不筵几。不禮賓。主人畢饋。禮賓唯饗餼之受。不賄。不禮玉。不贈。遭夫人世子之喪。君不受。使大夫受于廟。其他如遭君喪。遭喪將命于大夫。主人長衣練冠以受。聘君若薨于後。入竟則遂。赴者未至。則哭于巷。衰于館。受禮不受饗食。赴者至。則衰而出。唯稍受之。歸執圭。復命于殯。升自西階。不升堂。子卽位不哭。辯復命如聘。子臣皆哭。與介入。北鄉哭。出袒括髮入門右。卽位踊。若有私喪。則哭于館。衰而居。不饗食。

歸使衆介先衰而從之。賓入竟而死。遂也。主人爲之具而殯。介攝其命。君弔。介爲主人。主人歸禮幣。必以用。介受賓禮。無辭也。不饗食。歸介復命。柩止于門外。介卒。復命出。奉柩送之。君弔。卒殯。若大夫。介卒。亦如之。士介死。爲之棺斂之。君不弔焉。若賓死。未將命。則旣斂于棺。造于朝。介將命。若介死。歸復命。唯上介造于朝。若介死。雖士介。賓旣復命。往卒殯。乃歸。

此聘而遭喪之禮。謂使臣所聘之國君喪。未入其境。則反。旣入境。遂終聘事。其國不郊勞賓。無主也。使臣致命于殯宮。不于廟。不設筵几。如事生也。聘享畢。不

設醴禮賓非正主也。主人謂攝主。殯饗餼饗食之類。如常禮。盡以歸賓。賓不盡受。受唯饗餼。飲食不廢也。賄與禮玉。主君所以報聘君者。無主君。則否。贈以答私覲。君喪無覲。則否。若主君之夫人世子喪。則主君不親受聘享。使大夫代受于廟。大夫謂卿。遭喪謂君與夫人世子之喪。皆大夫攝主。而使臣致命。主人卽大夫。長衣深衣。練冠白布冠。以受聘享于廟。此遭主國喪之禮也。聘君使臣之君。使臣未入他國境。君薨。則反已入境。君薨。遂終聘事。報喪曰赴。私居曰巷。赴未至。喪未聞于外。故哭于巷。衰于館。不以凶服出。主

人有饗餼受饗食則不就也。赴既至，主國亦當闕樂。使臣乃衰出，以凶服將事。廩米曰稍，稍受，牲牢之類。則不受，使臣歸國復命于殯，如事生也。升自西階，殯在西階也。不升堂，臣見君于堂下也。子，嗣君也。卽位不哭，使臣將致告也。辯，徧通。使介徧以公賜告于殯。如君存，盡言賜禮也。子，臣皆哭，告畢也。使臣出，與介更入。北鄉哭，又出袒衣括髮入殯，宮門右，卽位踊。此以上，遭聘君喪之禮也。若使臣私有父母之喪，哭于館，不于公。衰而居，不以凶服行禮也。一食再饗，皆不就。饗餼猶受也。歸于途，使衆介先行，已凶服隨之。此

使臣遣家喪之禮也。若使臣死于他國，則主君爲舍斂之具，殯之聘享，則上介攝之。主君親弔，則介爲喪主。雖有家臣適子在行，不得主也。主君歸禮幣，取供喪用，不必如賓。周禮掌客，賓客死，致禮以喪用，是也。介代受賓禮，直受之，無復如賓存禮辭，所以明代也。主君饗食，介皆不就，不以飲食爲悅也。介歸復命，以使者柩造朝門外，終使事也。介復命畢，出送柩于其家。君親弔，視殯畢而後歸。此以上，遣使臣喪之禮也。大夫介，謂上介。其喪與使者同。士介，謂衆介。喪則主君爲棺斂，不親弔也。此遣介喪之禮也。若使者旣至，

國入館受殯未入廟行禮死則以其柩造主君朝介代爲將命若介死使臣歸復命惟上介以柩造朝衆介則否柩歸雖士介使臣復命出必送柩其家卒殯後歸若上介可知此以上遭賓介喪之禮也

按子云使于四方不辱君命可謂士矣天下無道禮樂征伐自諸侯出聘享事大之禮社稷之役臣子受命生死以之乃可無辱此讀聘禮者所當知然去皇華四牡之風道德功利古今治亂相違遠矣先王遣使臣以周諮民隱交鄰國以安天下非謂侈行李儀從飲食供帳之盛而已也

小聘曰問。不享。有獻不及夫人。句主人不筵几。句不禮。句面不升。句不郊勞。句其禮如爲介。句三介。

此小聘之禮。不享。無玉帛庭實也。獻隨意。獻國所有。不及夫人及君而已。不筵几。不行禮于廟也。使臣私覲于庭。不升堂。主君不使人勞賓于郊。其待賓禮。如大聘之待上介也。三介。視大聘少一人也。

記○久無事。則聘焉。若有故。則卒聘。束帛加書。將命。百名以上。書於策。不及百名。書於方。主人使人與客讀諸門外。客將歸。使大夫以其束帛反命於館。明日。君館之。○旣受行出。遂見宰。問幾月之資。使者旣受行日。句朝。

同位出祖釋較祭酒脯乃飲酒于其側○所以朝天子
圭與纁皆九寸剡上寸半厚半寸博三寸纁三采六等
朱白蒼問諸侯朱綠纁八寸皆玄纁句繫長尺絢組問
大夫之幣俟于郊爲肆又齎皮馬○辭無常孫而說辭
多則史少則不達辭苟足以達義之至也辭曰非禮也
敢句對曰非禮也敢

此以下皆雜舉前文所未備久無事謂無盟會之類
有故謂有事相告卒聘謂聘享事畢名謂書文卽字
也編竹簡曰策削木板曰方百字以上辭多編竹書
之百字以下方板書之讀其書於廟門外公事使衆

聞也反命爲書以報也君館之主君親適賓館也旣受行謂使臣初受君命遠行問幾月之資計行糧也卿行旅從宰制國用故見而問之受行日謂受命啓行日朝同位卽前使者載旛帥以受命于朝使者入衆介隨入北面東上所謂朝位也祖始也始行也釋猶奠也祖祭行神曰輶遠行跋涉故謂輶旣祭飲酒于側卽舍于郊之夕朝天子謂諸侯執圭合瑞也剡削也圭形下寬上狹下寬三寸上削寸半上居下半也纁藻通畫纁以藉圭朱白蒼三采相間各再就爲六等諸侯自相間纁朱綠二采天子諸侯纁皆玄纁

繒爲之繫以束縹緗采色組條也問大夫之幣君問也俟于郊待使者行授之不于朝避君禮也肆陳設也幣言肆皮馬言齎肆則齎互見也辭謂行禮時對答之辭無常猶無定唯謙遜和說爲主文勝則史辭曰者不受而言也對答也各言敢皆謂不敢也此辭之足達者

按雜記孔疏引朝天子圭以下有兩朱白蒼重言之正所謂三采六等本文脫三字當補主人使人與客讀書門外鄭謂人稠處嚴不得審悉又謂見宰問幾月之資爲君臣謀密未知所之二義皆迂周禮大宗

伯考工記皆云天子諸侯五等之圭各異今云諸侯朝天子圭纁皆九寸諸侯相問皆八寸相矛盾

卿館于大夫大夫館于士士館于工商○管人爲去聲客

三日具沐五日具浴○殮句不致賓不拜沐浴而食之

○卿句大夫訝句大夫句士訝句士皆有訝賓卽館訝

將公命句又見之句以其摯句賓旣將公事復見訝句

以其摯○凡四器者唯其所實以聘可也○宗人授次

次以帷少退于君之次○上介執圭如重授賓賓入門

皇句升堂讓句將授志句趨授如爭句承下如送句君

還旋而後退下階發氣怡焉再三舉足又趨及門正焉

○執圭入門鞠躬焉如恐失之及享發氣焉盈容衆介
北面踰焉私覲愉愉焉出如舒鴈皇且行○入門主敬
升堂主慎○凡庭實隨入左先皮馬相間可也賓之幣
唯馬出句其餘皆東句多貨則傷于德幣美則沒禮賄
在聘于賄

館不于敵者使賓全其尊使館主人嚴其敬也管人
司館舍之人客謂使臣髮曰沐體曰浴使臣初至館
宰夫致餼不用束帛致命餼禮輕也不致命故賓不
拜沐浴道路風塵自潔清也訝迎客者不以敵與館
同也訝將公命卽周禮秋官掌訝職云賓入館次于

舍門外待事于客是也。主君旣命訝見賓。訝又自見如私面也。見以其摯如大夫執鴈。士執雉之類。賓于聘享等公事畢。乃復見訝復報也。以其摯還之。四器謂圭璋璧琮。唯其所賓。謂擇其最重者以聘也。次門外。賓初至之次。君謂外諸侯。凡諸侯以下各有次。賓次少退。不與諸侯次并也。上介執圭。將行聘。執以授賓。如重猶論語云。執圭如不勝。曲禮云。執輕如不克。賓入門。執圭入廟門。皇莊盛也。讓恭遜也。對主君。將以圭授之。志誠專一。疾趨而前。如爭先授。唯恐遲也。手承圭下。使君取上。防失墜也。俟圭入君手。如送往。

者到彼而后反也。君既授玉于東楹之間，還反面東，然後賓退下西階。氣始發舒，再三舉足，從容數武，又如授時疾趨出廟門。顏色正復常也。再言執圭，更記所聞也。聘而鞠躬，敬也。享則發氣滿容和也。衆介踰焉，其貌揚也。私覲愉愉，其容婉也。禮畢出如舒鴈，徐翔也。爾雅鵠曰舒鴈。皇且行，盛容緩步也。庭實隨入，摯幣者皆魚貫入左先，以西爲上也。皮馬相間相代也。有皮無馬，有馬無皮可者，不定之辭。賓之幣，玉帛皮馬皆是。唯馬受則出付殿，餘皆收歸東壁。幣美沒禮文，勝掩實也。賄在猶在賄，如舜在璿璣，文王世子

在視寒暖之在察也專尚財賄是聘以賄而已也

按鄭謂館賓必于廟曾子問云公館與公所爲曰公館若今官舍云爾賓受大禮或假大夫家廟其羣居未必皆在人廟又謂殯賓沐浴而食爲尊主君夫且不拜豈以沐浴爲尊受饗受享何獨不然將授志趨爲句授如爭承爲句下如送爲句皆不成文義賄在聘于賄讀于作爲云以賓之聘禮爲賄之豐儉皆非也

凡執玉無藉者襲○禮不拜至醴尊于東廂瓦大太一有豐薦脯五臠或祭半臠橫之祭醴再扱始扱一祭卒

再祭○主人之庭實則主人遂以出賓之士訝受之○
既覲賓若私獻奉獻將命擯者入告出禮辭賓東面坐
奠獻再拜稽首擯者東面坐取獻舉以入告出禮請受
賓固辭公答再拜擯者立于閭外以相拜賓辟擯者授
宰夫于中庭○若兄弟之國則問夫人○若君不見使
大夫受自下聽命自西階升受負右房而立賓降亦降
不禮○幣之所及皆勞不釋服

執玉謂執圭璋璧琮皆有纁承藉無藉則以衣拊手
執之曰襲有藉則赤手執之曰裼禮通作醴賓聘享
于廟畢主君醴之賓至則拜醴質無拜至也東廂東

夾室瓦大瓦尊豐以置尊。犧猶脰也。橫加也。主人之庭實。所以禮賓。主人即使人執送出門。賓有司門外迎受。若賓私覲外。有方物私獻主君。則以聘君之命將之。俟于門外。擯入告。君禮辭而受。如受士介覲之禮。賓不入也。兄弟之國。謂同姓及與爲昏姻者。非是則聘問不及其夫人。君有他故不能見賓行禮。則使上大夫代受。上大夫于堂下。碑內聽命。如卿還王之禮。右房卽東房。升堂東爲右。上大夫自賓左受玉。右退東北。負房立待賓降。乃降不禮。不設醴。避正主也。幣之所及。謂大夫以上。聘君皆有問幣。卿大夫皆勞。

賓祖廟行聘享畢不脫朝服卽往勞賓于館先施貴
敏也

賜饗唯羹飪筮一尸若昭若穆僕爲祝祝曰孝孫某孝
子某薦嘉禮于皇祖某甫皇考某子如饋食之禮假器
於大夫盼班肉及庾疎車○聘日致饗明日問大夫夕
夫人歸禮旣致饗旬而稍宰夫始歸乘禽日如其饗餼
之數士中日則二雙凡獻執一雙委其餘于面禽羞俶
獻比○歸大禮之日旣受饗餼請觀訝帥之自下門入
各以其爵朝服○士無饗無饗者無償○大夫不敢辭
君初爲之辭矣○凡致禮皆用其饗之加籩豆無饗者

無饗禮○凡餼句大夫黍梁稷句筐五斛

羹飪謂歸饗之飪一牢賓以祭于行主腥餼則不祭也祭則筮一人爲尸昭穆謂子孫古者大事出奉廟主行子孫臣僕俱一尸者父在則祭祖父沒則祭禰也僕家臣祝告神者饋食之禮大夫惟少牢有陳設二厭九飯三獻等禮此雖大牢其禮亦如之假借祭器于主國卿大夫爵敵禮同也盼頒通分肉也廋車卽周禮廋人掌馬巾車掌車頒及二役則人無不徧矣行聘之日主君卽使卿致饗餼致饗之明日使臣致命問卿大夫問大夫日之夕主君夫人歸禮于使

臣致饗後旬日乃致廩食宰夫歸乘禽廩食曰稍鶩
鴨之屬曰乘禽如饗餼之數上賓饗餼五牢則乘禽
日五雙士介則間日二雙中日間一日也凡獻禽于
尊者執一雙所以將命也委奠也面前也禽卽乘禽
羞食品倣新物比倣也獻數者皆倣執一委餘之禮
歸大禮之日卽聘享畢之日使臣請遊觀主國朝廷
宗廟自下門入由便門不由大門非公事避君也賓
與上介士介各以其爵服朝服不敢褻服入也士無
饗謂主君子士介無饗但有餼耳士介亦無幣以饋
君使也大夫不敢辭謂私覲退賓請有事于大夫主

君既禮辭矣及賓問大夫損無再辭也凡主君有故不得親饗則使人致之邊豆有正有加君雖不親必併加邊豆以致不以不親殺也無饗者則無饗禮謂士介也主國大夫餼賓與上介以黍梁稷無稻大夫禮卑也

既將公事賓請歸○凡賓拜于朝訔聽之○燕則上介爲賓賓爲苟敬宰夫獻○無行則重賄反幣○曰子以君命在寡君寡君拜君命之辱君以社稷故在寡小君句拜君貺寡君延及二三老句拜又拜送句賓於館堂楹閒釋四皮束帛賓不致主人不拜

聽猶待也。苟敬詳燕記無行謂使臣獨聘本國無他往。如春秋吳季扎來魯則歷聘也。重賄所以報其幣也。反猶報也。曰以下主君館賓拜四事。擯者贊禮之辭。一拜聘享。二拜夫人聘享。三拜問大夫。四拜送賓行。賓釋四皮束帛報館主人也。不致不拜。鄭云不以將別崇新敬也。

大夫來使句無罪句饗之句過則餼之句其介為介有
大客後至則先客不饗食句致之

大夫來使謂外國大夫其君有事使來非專為聘耳
罪謂得罪如魯衛鄭得罪于晉執其大夫是有罪也

則無饗禮無罪。謂以好會。或謝罪來。雖非聘。必饗之。
過。謂適他邦。過此則餼之以生牲。其介爲介。享大夫。
使者之禮也。大夫爲賓。則其介仍爲介。異于聘之以
介爲賓。以大夫爲苟敬也。有大客。謂有大國賓。後至。
則先客爲小。以饗食致先客。而親享大客。隆殺之等
也。

按斯禮起于春秋五霸之季。無疑也。賓爲苟敬。主君
不敢饗。而賓其上介。是苟庚郤犇之賓也。無行而後
重賄。春秋諸大夫之聘。絡繹也。特往而無行者。寡矣。
大夫奉使。有罪被執。世儒所謂伯討也。其來過者。非

亡則叛樂盈輩也其大客則晉楚大夫也其先客則魯簡之使也皆衰世之蹟而鄭氏謂使無罪過之臣與嘉賓爲禮賓如有過則不享而與之餼有罪則執之此附會聘義愧厲之說其實非也

唯大聘有几筵○十斗曰斛十六斗曰簋十簋曰秉二百四十斗四秉曰筥十筥曰稯杜十稯曰秬杜四百秉爲一秬

二百四十斗一車之米數所謂秉有五簋者也四秉猶言四把刈禾爲把筥禾秉之數與筐筥異一車之禾三秬蓋千二百把也

儀禮會解

卷八

三十一

七

儀禮節解卷八終